



Múte B. Egede (Inuit Ataqtigiit) Inatsisartunut ilaasortaq

§ 37 naapertorlugu apeqqutip 062-ip akineqarnera: Atorfilittat mute dk-1

09-03-2016
Suliap nr. 2016-4768
All. nr. 2298015

Asasara Múte B. Egede

P. O. Box 1037
3900 Nuuk
Oqarasuaat +299 34 50 00
Nassitsigasuaat (+299)346350
E-mail: oed@nanoq.gl
www.naalakkersuisut.gl

Inatsisartut suleriaasianni § 37, imm. 1 naapertorlugu Namminersorlutik Oqartussani nunaqavissut atorfinitsinneqartarnerat, taakkualu ilinniarteqqittarnerat pillugit tallimanik apeqquteqarsimavutit. Apeqqutinnut akissutikka ataani tul-leriaarlutik allassimapput.

1. Namminersorlutik Oqartussani taassumalu ingerlataani piffissap aaliangersimasup iluani nunaqavissunik ilinniarsimasunik amerlanerpaanik sulisoqalernissamik pilersaaruteqartoqarpa?

Namminersorlutik Oqartussani imaluunniit ingerlatseqatigiiffinni namminersorlutik oqartussanit pigineqartuni piffissap aalajangersimasup iluani sapinngisamik inunnik amerlanerpaanik atorfinitsitsinissaq Naalakkersuisut anguniagarinngilaat. Paarlattuanik Naalakkersuisut pisortani oqartussaaffiit ikilisinneqar- nissaat, sulisinnaasullu amerlanerit namminersorlutik inuussutissarsiuteqartuni sulilernissaat takorusunneruaat.

Sulisunik nutaanik atorfinitsitsinissaq pisariaqartinneqarpat Namminersorlutik Oqartussani sulisussarsiortarnermut najoqqutassat malillugit atorfinnut ataa- siakkaanut sanilliullugu inuit suliamekkut inuttullu piukkunnarnerpaat atorfini- tsinnissaat anguniagaavoq.

Anguniagaq tamanna anguneqassappat suliassamut sanilliullugu qinnuteqartup suliatigut inuttullu pisinnaasai nalilersorneqartussaapput. Aqutsisutut atorfim- mut atorfinitsitsinermi aqutsisutut piukkunnaatit minnerunngitsumik naliler- sorneqartussaapput.

Namminersorlutik Oqartussat Qitiusumik Allattoqarfiani aqutsisunik nunaqa- vissunik amerlanerit atorfinitsitsinissamut tunngatillugu Aningaasaqarnermut Sulisoqarnermullu Aqutsisoqarfimmiit nalilerneqarpoq Qitiusumik Allattoqar- fimmi fuldmægtigit ilinniagartuut pikkorissut, kalaallisullu tunuliaqutallit ator- finitsinnissaannut tunngavissaq pigineqartoq qaffakkiartortorlu. Tamanna aaq- qissuussaannikkut nammineq ingerlavoq, ilinniartitaanernullu periusissanut qa- nilluni.

Apeqqu Tippit akinissaanut suliffeqarfissuarnit namminersorlutik oqartussanit pigineqartunit paasissutissanik piniarpugut, taakkulu ataani atuarneqarsinnaapput.

Greenland Holding allappoq:

”Greenland Holdingimi pisortaq nunaqavissunik atorfinitsitsisarlutik oqarpoq”

Illuut allappoq:

”Illuut A/S sulisoqanngilaq, taamaattoq nunaqavissunik pisortaqatigeearput, Ineqarnermut, Sanaartornermut Attaveqarnermullu Naalakkersuisoqarfimmit atukkiunneqartunik.”

Royal Greenland allappoq:

”Piffissamik aalajangersumik aalajangiussaqaqanngikkaluarluta, sapinngisamik sulisut nunaqavissut ilinniarsimasut ilinniarsimangitsullu amerlanerpaat atorfinitsinniarlugit ataavartumik sulivugut. Tamanna amerlanerpaatigut iluatsippoq, atorfiit tamangajavimmik nunaqavissunit inuttalerneqartarput.”

Air Greenland allappoq:

”Air Greenland atorfinitsitsinermini nunaqavissuuneq tunngavinnut tamatigut ilaatinneqartarpoq, atorfinnullu assigiinngitsunut piukkunnartut nalilersorneranni tamanna pitsaaqutitut naliliutaasarpoq. Taamaalillunilu suliffeqarfik atorfinitsitsiniarnermini, suliffeqarfiup avataaneersunik atorfinitsitsinissani pinaveersaartikkumallugu ilungersuuteqartarnera.”

Royal Arctic Line allappoq:

“2015-ip naanerani Royal Arctic Linep Kalaallit Nunaanni atorfinnik inuttaqanngitsunik inuttaliiniarnermi avataanit suliarortitanik atuinerup pinngitsoortinnissaanik politikeqarneq suaarutigaa. Pisunilu immikkut ilisimasaqarnissaq pissutigalugu pisariaqartitsiviulersillugit, avataanit tikisinneqartut annerpaamik ukiuni 1, 2 amerlanerpaamik 3 sivitsorneqarnissamut periarfissaqaqanngitsumik isumaqatigiissuteqarsinnaanerannik neqeroorfigineqartassapput. Suliarortitanullu taamaattunut suliarortitap sulinermini paarlatsissaminik ilinniartitsisarnissaa pingaartinneqartassaaq. Royal Arctic Linep atorfiit nunaqavissunit inuttalerneqartarnerat suliffeqarfiup aningaasaqarneranut pitsaasuusutut isigaa. Ilaatigut atorfinitsitsinermini, nuunnermi aningaasartuut annikinnerusarput, taamatullu aningaasartuutit naleqqussarniarnermut attuumassuteqartut appasinnerusarlutik. Kalaallit Nunaanni nunaqavissut immikkut piginnaasallit ikittuuneri pissutigalugit, akissarsianik qaffakkiartornermut aarlerinaat annertusisinnaavoq. Umiarsuaatileqatigiiffiullu sukkulluunniit akissarsianik qaffakkiartornermik aarlerinaatip taamaattup suliarortitanik piffissamik aalajangikkamik isumaqatigiissuteqarluta atorfinitsitsinernek atuisarnissatsinut naliutigisarumaarpai. Atorfinnullu nunaqavissut suliffissaaleqiffigisaannut tamanna suliffeqarfimmut aammali inuiaqatigiinnut iluaqutaalluassaaq, ingammik suliffinni suliffissaaleqisut suliffigilersinnaasaanni imaluunniit ilisimasat pigineqareersut annertusarneqarlutik amerlanerusunik tunngaviusumik piginnaasat qaffasissusaannik inissaqalersitsisinnaasunik. (Royal Arctic Linep politikimik nassuiaataanut toqqammaviliinermut): Royal Arctic Linemi inuttut iliuusissatut pilersaarutit kisimik pikkorissaanernut

sinaakkusiisuusarput. Sulisut tamarmik suliffeqarfiup anguniagassatut aalajangiussaani inissaqarput. Piginnaasat taakku ineriartortinneqariaqarput, immikkoortitaarlutillu pisortap sulisullu ukioq kaajallallugu nalilersorneqartuarlutik. Piffissamut aalajangikkamut suliarortitanut tunngatillugu matumani piginnaasat inissinneqareersut pineqartup, taamaammallu pikkorissartitsinissamut pisariaqartitsinerit eqimattanut pineqartunut taakkununga annikitsuaraasussatut isigineqartariaqarpoq.”

Visit Greenland allappoq:

”Visit Greenlandimi sulisoq ataaseq, Kalaallit Nunaanni ukiuni pingasuni najugaqarsimasoq, Visit Greenlandimilu ukioq ataaseq affarlu sulisoq eqqaassanngikkaanni, sulisut tamarmik nunaqavissuupput. Avataanit suliarortitat atorneqarneq ajorput. Københavnimi allaffimmi sulisut pingasut tamarmik kalaallinit/danskinit kingoqqisuupput, Kalaallit Nunaanni peroriartorsimasut.

Visit Greenlandimi sulisut tamarmik ukiut tamaasa piginnaanngorsarfiusumik sulianut attuumasunik pikkorissarnissanik isumasioqatigiinnissanullu peqataanissamut neqeroorfigineqartarput.”

Great Greenland allappoq:

”Great Greenlandimi atorfiit tamarmik piginnaasalinnik atorfinitsinniarneqartarput, ajornanngippat kalaallinit attuumassuteqartunik. Qaqortumi fabrikki sulissut marluinnaat kalaallinit kingoqqisuunatillu nuuttuupput Kalaallit Nunaannut sivilisumik attuumassuteqarput. Danmarkimi allaffimmi pissutsit taamatut aamma ipput, tassanilu inuk ataasiinnaq kalaallinit kingoqqisuunngilaq.

Great Greenland kalaallit inuusuttut piginnaanngorsarneqarneranni imminut pingaartutut inissisimasutut isigivoq, taamaammallu suliffeqarfiup akuttunngitsumik kalaallit ilinniagaqartut praktikertutut atorfinitsillugilluunniit ilinniarnermik nalaani ikiortitut atortarpai. Tamanna Qaqortumi Glostrupimilu pisarpoq.”

NUNAOIL allappoq:

”NUNAOIL A/S-ip suliffeqarfiup suliassaasa sapinngisamik pitsaanerpaamik naammassineqartarnissaat siunertaralugu suliuarpoq. Taamatut oqimaalutaanermi Kalaallit Nunaannut attuumassuteqarneq annertuumik pingaartinneqartarpoq, suliffeqarfimmi taamaalilluni sulisunik kalaallinit attuumassuteqarluni sulisumik, taamaalillunilu atorfimmi nunamilu sivilisunerusumik atanissaa ilimanaateqarneruvoq. Taakkulu tamarmik NUNAOIL A/S-imut pingaaruteqarput.

Uuliasiornermi immikkut ilisimasaqartariaqarneq pingaartuujuannarmat, NUNAOIL A/S-ip nunaqavissunik sulisussarsiniarnera, piginnaasat Kalaallit Nunatsinni pigineqannginnerat pissutaalluni ajornakusoorpoq.”

Greenland Oil Spill Response allappoq:

”Sapinngisamik nunaqavissunik atorfinitsitsiniartarnerput oqaatigaarput.”

INI allappoq:

”160-t missaanni sulisoqarpugut. Isiginneriaaseq atuuttoq atussagutsigu, taakkuanga pingasut ”maanimiuunngillat”. Tamatigut piffimmi najugaqartu ”maanilu najugaqartut” atorfinitsitsiniarnitsinni pingaartissallugit sulisoqarnermut politikeqarpugut.”

Sikuki allappoq:

”Aap, siunissami atorfinitsitsisarnissatsinni tamanna ilimagisariaqarpoq.”

KNI allappoq:

”Sulisut ataatsimut isigalugit najugaqarfissuunngitsut sulisut tamarmik akornanni ikittuaraapput.

800-t missaanni sulisoqarpugut, taakkunangalu sulisut 20-it missaat kalaallisut oqaaseqartuunngillat, taakkulu ilaat inuunermik annertunersaani Kalaallit Nunaanni najugaqarsimanerat pissutaalluni maani najugaqartutut/najugaqavissutut isigineqartariaqarput.

KNI A/S-ip TAQQISSUUT aqutigalugu sulisut tamarmik akornanni piginnaangorsaanermik annertusaavoq.”

Telepost allappoq:

”Suliffeqarfiup politikkaa

TELE-POST assigiinngiiaartuunissamik politikeqarpoq, taannalu ilaatigut sulisunik pisortanillu piffimmit aallaaveqartumik atorfinitsitsisarnissamik patajaallisaanissamik siunnerfeqarpoq. Suliffeqarfiup pisortanut maanna sulisoqarnissaminit kiisalu sulisunut pisortanngornissamut periarfissaqartunut, pisortatut ineriartornermik pikkorissaanermik neqerooruteqartarpoq.

Taamattaaq atorfiit inuttaqanngitsut suliffeqarfiup iluani inuttassarsiuunneqartarput, suliffeqarfimmilu sulisut piukkunnaatillit, atorfiit inuttaqanngitsut inuttalerneqarneranni ilanngullugit nalilersorneqartarput. 2016-imi ilanngullugu suliniutit arlallit suliffimmi arnartatsinnut piukkunnarsaanermik imaqartut kiisalu taakku suliffeqarfimmi pisortatut atorfinnik qinnuteqarnissaannik kaammattuinerneq imaqartut aallartisarneqarput.

Ullumikkut killiffik

TELE-POSTip pisortaaneri maanna atuuttut inunnik arfineq pingasunik inuttaqarput, taakkunanilu pisortaaneq kisimi Kalaallit Nunaannut qanimut attuumassuteqanngilaq. Siulersuisut tassannga toqqaanissaminni, taassuma angusarissaarnera ukiorpassuarnilu Savalimmiuni suliffeqarfimmi taamaattumi pisortaanera patsisigaat. Pisortaqatigiinni sinneruttuni arfineq marlunni, marluk marluinnik oqaaseqartuupput, sinnerilu tallimat danskisut oqaaseqartuullutik. Tallimat taakku tamarmik ukiut 20-it sinnerlugit Kalaallit Nunaannut attuumassuteqarput.

Taamattaarlu suliffeqarfiup pisortanut tullersortigisaasa 50-it amerlaneraat, TELE-POST-ip allanik atorfiit qaffatsinneqarlutilluunniit Kalaallit Nunaannit sulisussarsiaapput. TELE-POST suliffeqarfiuvoq teknologimik qaffasissumik ingerlatsiffiusoq, nunanilu allani suiffeqarfiit taamaattut allat assigalugit ilinniagartuunit avataaneersunik pilerisitsisinnaanermut pisariaqartitsisoq. Tamanna taamaalilluni taamaallaat TELE-POST-imut atuutinngilaq, aammali Kalaallit Nunaanni IT-mik nalunaarasuarnermillu suliffeqarfinnut tamanut atuulluni. Tamanna ingammik ingeniøritut ilinniagalinnut atuuppoq, aammali suliniutinik aqutsisunut, IT-teknikerinut aammalu aningaasaqarnermik aqutsinerneq ingerlatsisunut (cand.merc. imaluunniit HD-tut ilinniagalinnut). TELE-POST ukiorpassuit ingerlaneranni

allaffissornermik, montørinik datateknikerinillu nammineq ilinniartitsisarpoq, tamannalu kinguneqarluarpoq. Taamaalillunimi TELE-POST ullumikkut telemontørinik allaffimmiunillu imminut pilersortuuvoq. Aammalu ilaatigut akademi-merkonominut tunngatillugu suliffeqarfik misilittagaqarluarpoq, ullumikkullu inuusuttut arlallit, piginnaasaqarluartut sulisoralugit, siunissami immikkut ilisimasalittut pisortatulluunniit ineriartoqqinnissamut periarfissaqarluartut.

TELE-POST sulisunik arlalinnik Danmarkimi nunaniluunniit allani ilinniareerlutik utertunik sulinissamik pilerilersitsisinnaasarpoq, pikkorinnerilli nutsoruunneqartarput. Nunaqavissut inuusuttut ikittuinnaat sivisunerusumik ilinniagaqalersarnerisa siunissami pisortaalersussanik pissarsiniarsinnaanerput piginnaangorsaasinnaanerpullu ajornakusoortippaa, tamannami suliffigisimasanik misilittakkatulli suliffeqarfiup pisortatut immikkullu ilinniarsimasunik atorfiini arlalinni annertuumik oqimaalutarneqartarnera ilaasarmat. Ilinniartitseqqittarnerit POST-ip sulisunik tigungminniinnarnissamut politikianut ilaavoq, suliffeqarfiullu sulisorisami attuumassuteqarnerat aallaavigalugu sulisuminik immikkoortitsinissani akuersaarsinnaanngilaa. TELE-POST-i sulisunik aalajangersimasunik atorfinitsitsisimaguni, sulisoq taanna sumit kingoqqisuunini apeqqutaatinnagu atorfimmi ineriartornissamut periarfissaqarnissamut pisinnaatitaaffeqarpoq. Ilinniartitseqqiinerit suliffeqarfiup sulisullu ataasiakkaat ineriartornissamut pisariaqartitaat periarfissaallu aallaavigalugit pilersaarusioneqarlutillu akuerineqartarput. TELE-POST-ilu nalinginnaasumik sivikitsuinnarmik atorfinitsitanik ilinniartitseqqinnissamut aningaasaliisannngilaq, suliffeqarfimmilu pisortat amerlanerpaat sivisuumik Kalaallit Nunaanniisimallutillu sivisuumik suliffeqarfimmi suliffeqarsimasuupput.

Sulilersitsisarnerit patajaallisarniarlugit qanoq iliortoqarsinnaava Oqaatigineqareersutut pitsaasumik ineriartortoqarpoq, ingammillu ukiuni kingullerni ilinniartuarsimasut amerlanerusut, suliffeqarfiup TELE-POST-itut ittuq piginnaanernik ujartugaanik piginnaanillit takussaanerulersimapput. Taamatut ineriartorneq ingerlaannassaaq, ajornanngippallu ingammik teknikip IT-mullu tunngasup iluani suli patajaallisarneqassalluni, tassanilu fagteknikerini iluatsitseqqavugut, ikippallaalli datalogimi nalunaarasuarnikkullu attaveqarnermi sivisunerusumik ilinniagaqarsimasuupput. Ingammik matematikimut/teknikimut piginnaasat inuusuttut ilinniartitaaneranni patajaallisarneqartariaqarput, inuusuttullu suli annertunerusumik pinngortitalerinnermut inuiaqatigiilerinnermullu qaffasissumik ilinniagaqarnissamut pilerilersinneqartariaqarput. TELE-POST ataavartumik ilinniagaqarnernik saqqummersitsinerni peqataasarpoq, praktikerfissanik neqerooruteqartarluni kiisalu kalaallit ilinniagaqartut suliatsinnut suliffeqarfitsinnilu sulisinnaanermit soqutiginninnerulersinniarlugit, soraarummeerutaanni case aamma sparringspartneritut atuuttarpoq. Ilinniagaqarnerup naammassineranit ukiut pingasunit tallimanut qaangiunneranni aatsaat sulisup pisortannorsinnaanermit soqutiginnittup angusaqartarnera pisortannogqaarnissamillu neqeroorfigineqarnissamut naammattunik misilittagaqarnera pisarmat. Aatsaallu suli ukiualuit ingerlareeraangata pisortatut qaffaffissamut tullermut annguttoqartarpoq.

Taamaammallu suliffeqarfiup maanna piginnaasalinnut ineriartortitsinermik suliaqarnera aatsaat ukiualuit qaangiuppata pisortaanertut qaffasitsigisuni ersiuteqalissaaq. Taamattaarlu suiffeqarfiup pikkorissorpassuarnik pisortaaninnngornissamut anguniagaqanngikaluarlutik, immikkut attuuffimminni sulilluartunik – taamaammallu atuuffinni taakkunani pingaarutilittut inissisimasunik sulisoqarnera eqqaassallugu pingaaruteqarpoq. Taamaammat TELE-POST-ip suliffeqarfinni ilinniakkani assigiinngitsuni piginnaanngorsarfiusunik ilinniaqqinnernik neqerooruteqarnissani, siunissami pisortassanik ilinniartitsinissatulli pingaartitsigaa.”

2. Namminersorlutik Oqartussani atorfiit nunaqavissunik inuttalersornerulernissaannik siunertaqarluni atorfinitsitsinermut politikkkiliornissaq aningaasatigut allaffissornikkullu suut kingunerissavai? – Taama-tullu politikkkiliortoqassappat Naalackersuisut suut pitsaaqutitut ajoqutaasinnaasutulluunniit isigaat?

Soqarnaviannngilaq, inuit avataaneersut pisariaqartillugu salliutinnginnissaat aqqutigalugu sulisussat Nunatsinneersut pingaarnertut atorfinitsittarnissaat siornatigulli politikiuvoq. Atorfinitsitassat nunatsinni tunuliaqutallit sulisori-lerniarnissaat siunertaralugu suliniutinik arlalinnik aallartitsisoqareersimavoq.

- Sulisussarsiorarnernilu kalaallisut tunuliaqutallit Namminersorlutik Oqartussat pilerisaarutigineranni atorneqartarput.
- Kalaallit Nunaanni sulisussarsiornernut allagarsiissutit suli. gl-imi aamma Sermitsiaq.ag-mi saqqummiunneqartarput.
- Ukiumoortumik suliffinnut paasititsiniaanerni kalaallit Danmarkimi ilinniagallit, ilinniakkanillu naammassinninnikut Kalaallit Nunaannut attuumassutillit Danmarkimut nunasinikut pingaarnertut saaffigineqartarput. Nunaqavissut piukkunnaatillit annerusumik sulisussarsiarineqartarnissaat anguniagaavoq, tassungalu ilanngullugu pisortatut atorfinnut atuutilersussanut sulisussarsiorarnermut tunngaviliinissaq.

3. Namminersorlutik Oqartussani atorfillit pikkorissartittarnerini nunaqavissut salliunneqarpat? Nunaqavissut pikkorissaanerni piginnaanngorsaqinneqarlutik salliunneqarpata suut kingunerissavai?

Namminersorlutik Oqartussani pikkorissartitsinerit Namminersorlutik Oqartussat sulisuinuinnaq sammitaapput. Taamatut pikkorissartitsisarnerni sulisut sumit aggersuunerat, suaassusiat, kinguaassiuutitigut tiingariaasiat imaluunniit allat apeqqutaatinneqarneq ajorput. Akerlianik pineqartup atorfianut tunngatil-lugu piginnaasaqarnerulernissap sulisumit qanoq pisariaqartinneqartiginera pi-ngaarnertut isiginiarneqartarpoq.

4. Namminersorlutik Oqartussani atorfilinnik nunaqavissunik piginnaanngorsaaqqiinissamut immikkut iliuuseqarnissamik pilersaaruteqartoqarpa?

2004 aallartiffigalugu Namminersorlutik Oqartussat ilinniartitaanernut immikkut ittunik suliniuteqarpoq, taakkunanilu ilinniaqqinnissaq immikkut pingaartinneqarluni. Soorlu AI2016-imi konto pingaarneq 20.30.02-mi nassuiarneqartoq: "Ilinniartitseqqinnermut aningaasaliissutini anguniagaavoq Qitiusumik allaffeqarfimmi sulisutakornanni pisinnaasaqarnerulersitsinissaq piginnaasaqarnerulersitsinissarlu."..... "Aammattaaq ilinniartitseqqinnermut aningaasaliissutini aningaasat atorlugit najukkamisulisussarsiornerulernissaq, sulisorinniniarnerulernissaq Qitiusumillu allaffeqarfiup suliffittutiluarineqarnissaa naammagisimaarneqarnissaa anguniagaavoq. Najukkami sulisussarsiornerunikut sulisullu sulisoriinnarniarnissaat inuiaqatigiinnut, politikeqarnermut Qitiusumillu allaffeqarfimmut iluaqutaassapput."

5. Namminersorlutik Oqartussani nunaqavissut qaffasissumik atorfeqalernissaat siunertaralugu piginnaanngorsaqquineq qanoq akeqassava?

Ajoraluartumik apeqqutigineqartoq paasiuminaappoq. Naalakkersuisulli ilimagaat Namminersorlutik Oqartussani pisortatut atorfiit tamakkerlugit isumagineqassappata sulisut nunaqavissut ilinniarteqqinnissaat qanoq akeqassanersoq apeqquteqartup paasiumagaa.

Kissaatigineqartutut naatsorsuisoqarnissaa akuerineqarsinnaasumik qularnaarlugu ingerlanneqarsinnaanngilaq, tassungalu pissutaavoq atorfimmuut aalajangersimasumut tunngatillugu sumik ilinniaqqittoqarnissaa pisariaqartinneqassanersoq inummumut ataatsimut apeqqutaasussaammat. Tamatumalu saniatigut oqaaseqatigineqassaaq pisortatut atorfiit isumaginissaannut pisinnaasaqarniaraanni sumik ilinniagaqarneq kisimi apeqqutaasussaannngimmat, misilittakkalli, inuttut piginnaasat aqutsersussuserlu aamma apeqqutaasussaammata.

Susassaqarfiup iluani suliniutit arlallit aqutigalugit pisortatut atorfiit isumagilernissaannut Qitiusumik Allattoqarfimmi sulisut piginnaasaqalernissaat anguniarlugu ikiuukkusulluni Aningaasaqarnermut Sulisoqarnermullu Aqutsisoqarfik ataatsimut isigalugu tapersersuivoq:

- Aqutsisunngornissamut pikkorissarneq, tassani fuldmægtigit pisortatut sulinissamik piareersimanerlutik paasissallugu periarfissaqarlutik.
- Pisortatut pikkorissartitsinerit assigiinngitsut Aningaasaqarnermut Sulisoqarnermullu Aqutsisoqarfimmit neqeroorutaasut aqutigalugit ingerlaavartumik pikkorinnerulernissamut periarfissat.
- Qitiusumik Allattoqarfiup ilinniarnissanut takussutissiaani ilinniaqqinnissamut periarfissat assigiinngitsut takutinneqarput, soorlu assersuutigalugu HD Aqutsisut aqqissugaanerlu.

Suliassat aningaasaqarnerlu eqqarsaatigalugit pikkorissartitsinissanut peqataanisat pisortanut ataasiakkaanut tamatigut isumaqatigiissutigineqaaqqartassapput.

Tamakku saniatigut ilinniaqqinnissamut pisariaqartitsinerit pisortanut ataasiakkaanut immikkut isumaqatigiissutigineqassapput, immikkoortullu ataasiakkaat namminneq missingersuutaat aqutigalugit aningaasalersorneqassallutik.

Inussiarnersumik inuulluaqqusillunga
Med venlig hilsen

Randi Vestergaard

A handwritten signature in blue ink that reads "Randi Vestergaard". The signature is written in a cursive style with a large initial 'R'.